

আল্লাহ্ তা'আলার প্রতি বিশ্বাস স্থাপন করা

আল্লাহ্ তা'আলা এক ও অদ্বিতীয়। তাঁর কোন শরীক নেই। আল্লাহ্ তা'আলা অসীম দয়ালু। সমগ্র পৃথিবীর সকল কিছুই তিনি সৃষ্টি করেছেন, তিনি সকল জীবের আহার যোগান। তিনি সমগ্র পৃথিবীর একমাত্র প্রতিপালক ও মা'বুদ। আমাদের দেখা-অদেখা, জানা-অজানা, সকল কিছুর একমাত্র স্রষ্টা আল্লাহ্ তা'আলা।

তিনি মানুষের প্রকাশ্য-অপ্রকাশ্য সকল প্রকার কথা, কাজ ও চিন্তা-ভাবনা সম্পর্কে অবগত। তিনি আরশের উপরে থেকেই পৃথিবীর সবকিছু দেখেন, শুনে, জানেন এবং সর্বত্র সবকিছু করার ক্ষমতা রাখেন। তিনি আপন সত্ত্বায় আরশের উপর রয়েছেন। তিনি সর্বত্র বিরাজমান নন।

আল্লাহ্ তা'আলা বলেনঃ (الرَّحْمَنُ عَلَى الْعَرْشِ اسْتَوَى)

“দয়াময় আল্লাহ্ তা'আলা আরশের উপর রয়েছেন”। (সূরা ত্বহা-৫)

সূতরাং প্রমানিত হয় আল্লাহ্ তা'আলা সপ্ত আসমানের ঊর্ধ্ব আরশের উপর রয়েছেন। তিনি সর্বত্র বিরাজমান নন। তবে তাঁর জ্ঞান, দর্শন, শ্রবণ ও ক্ষমতা সর্বত্র রয়েছে।

আল্লাহর প্রকৃত পরিচয়ঃ

আল্লাহ্ তা'আলা বলেনঃ

قُلْ هُوَ اللَّهُ أَحَدٌ (۱) اللَّهُ الصَّمَدُ (۲) لَمْ يَلِدْ وَلَمْ يُولَدْ (۳) وَلَمْ يَكُنْ لَهُ كُفُوًا أَحَدٌ (۴)

১। বল, তিনি আল্লাহ্, এক-অদ্বিতীয়।

২। আল্লাহ্ কারো মুখাপেক্ষী নন, সকলেই তার মুখাপেক্ষী।

৩। তিনি কাউকে জন্ম দেননি এবং তাঁকেও জন্ম দেয়া হয়নি।

৪। আর তার কোন সমকক্ষও নেই। (সূরা ইখলাস- ১-৪)

আল্লাহ্ অসীম দয়ালুঃ

আল্লাহ্ তা'আলা অসীম দয়ালু। সমস্ত পৃথিবীর সকল কিছুই তাঁর দয়ার মুখাপেক্ষী। তাঁর দয়া ছাড়া কেউ বাঁচতে পারে না। আলো, বাতাস, পানি ও খাদ্য ছাড়া আমরা বাচিনা। এগুলো আমরা তৈরি করতেও পারিনা। এসব কিছুর একমাত্র স্রষ্টা আল্লাহ্ তা'আলা এবং সবকিছু তাঁরই বিশেষ দান। আল্লাহর বাণীঃ

(الرَّحْمَنُ الرَّحِيمُ) “পরম দয়াময়, অতিশয় দয়ালু”। (সূরা আল ফাতিহাহ- ৩)

আল্লাহ্ তা'আলা একমাত্র রিজিকদাতাঃ

সকল রিজিকদাতা একমাত্র আল্লাহ্ তা'আলা। তিনি সমগ্র পৃথিবীর সকল প্রাণীর খাবার যোগান। পৃথিবীর সকল প্রাণীই খাবার খেয়ে বেঁচে থাকে, তবে প্রত্যেক প্রাণীর খাবার ভিন্ন রকম হয়ে থাকে।

আল্লাহ তা'আলা নানা রকম ফলমূলসহ অনেক খবার সৃষ্টি করেছেন মানুষের জন্য, কিছু প্রাণীর গোশতও হালাল করেছেন। অনুরূপভাবে পৃথিবীর সকল জীব-জন্তুর জন্য ভিন্ন রকম খাবার সৃষ্টি করেছেন। গরু-ছাগল খায় ঘাস ও লতা-পাতা, পাখিরা খায় বিভিন্ন রকমের পোকা-মাকড় ও ফলমূল। কোন কোন বন্য জন্তু খায় ছোট ছোট জীব-জন্তুর রক্ত আর গোশত, গাছ-পালা আহার করে মাটির রস ও সূর্যের আলো-বাতাস। এভাবে পৃথিবীর সকল প্রাণীই খাবার খেয়ে বেঁচে থাকে। পৃথিবীর প্রতিটি প্রাণীর রিজিক দেন একমাত্র আল্লাহ তা'আলা। আল্লাহ তা'আলা বলেন:

(وَمَا مِنْ دَابَّةٍ فِي الْأَرْضِ إِلَّا عَلَى اللَّهِ رِزْقُهَا)

“পৃথিবীতে বিচরণকারী সকল প্রাণীর রিজিকের দায়িত্ব একমাত্র আল্লাহ তা'আলার।” (সূরা হুদ-৬)

সুতরাং যারা নিজেরা পরিশ্রম করে আয়-রোজগার করে তাঁদের রিজিক যেমন আল্লাহ তা'আলা যোগান, তেমনি যে সকল প্রাণীর মানুষের মত জ্ঞান নেই তাঁদেরও রিজিক দিয়ে থাকেন একমাত্র আল্লাহ তা'আলা।

অতএব আমরা হালাল রিজিক তলাশ করব এবং একমাত্র তাঁরই এবাদত করব। কারণ যিনি রিজিকদাতা, তিনিই একমাত্র ইবাদাত পাওয়ার যোগ্য। মহান আল্লাহ তা'আলা বলেন:

(فَابْتَغُوا عِنْدَ اللَّهِ الرِّزْقَ وَاعْبُدُوهُ)

“সুতরাং তোমরা রিজিক তলাশ কর আল্লাহ তা'আলার নিকট এবং একমাত্র তাঁরই ইবাদাত কর।”

(সূরা আল আন কাবূত-১৭)

আমরা একমাত্র আল্লাহর ইবাদাত করব:

আল্লাহ আমাদের সৃষ্টি কর্তা, প্রতিপালক ও মা'বুদ। তাই আমরা একমাত্র আল্লাহর ইবাদাত করব। আল্লাহ ছাড়া অন্য কারো ইবাদাত করব না। আমরা আমাদের সকল প্রকার ইবাদাত যেমন- সালাত, সাওম, কুরবানী, নযর-মানত ইত্যাদি একমাত্র আল্লাহর জন্যই সম্পাদন করব। তাঁরই আইন বিধানমত আমাদের জীবন পরিচালনা করব।

আমরা প্রত্যহ সূরা আল ফাতিহায় পড়ি-

(إِيَّاكَ نَعْبُدُ وَإِيَّاكَ نَسْتَعِينُ)

“আমরা শুধুমাত্র তোমারই ইবাদাত করি এবং শুধুমাত্র তোমারই কাছে সাহায্য প্রার্থনা করি।” (সূরা আল ফাতিহা-৫)

অতএব, আমরা একমাত্র আল্লাহর বিধি-বিধান মেনে চলব, তাঁরই আনুগত্য করব এবং যাবতীয় ইবাদাত শুধু তাঁরই জন্য সম্পাদন করব। তিনি ব্যতীত কারো দাসত্ব করব না, ক্ববর- মাযার, গাছপালা, পাহাড়-পর্বত ইত্যাদি কোন ব্যক্তি বা বস্তুর কাছে মাথা নত করব না। কারণ সকল প্রকার ইবাদাতের মালিক তিনিই যিনি আমাদের সৃষ্টিকর্তা, রিজিকদাতা আর তিনিই হলেন আল্লাহ তা'আলা।

